

2 Pegodo cadota ante nänö ayænta yewæmongainta

Wængonguï mīnitō imīnite waa cæccæcāimpa, ante

¹ Botō Timönö Pegodo inömo inte Itota Codito ingante nē cædömö iñömote tōmengä botō imote da godongä godinque botō tōmengä beyæ nē apænebo bagaboimpa. Mönö Wængonguï inongä inte Itota Codito iñömö mönö imonte, Quëwencæminimpa, ante nē Ængaingä ingampa. Tōmengä iñömö mönitō imönite pönö cædinque, Mini wede pönönö ante waa pönī entawencæminimpa, ante pönongä ænimöni inte entawëmönipa. Ayæ adobaï tōmengä nē nö pönī cædongä inte mīnitō imīnite pönongä æninque mīnitō mönitō entawönö baï ado mīni wede pönönö ante edæ waa pönī entawëmīnipa. İninque mīnitō imīnite botō, Acæminimpa, ante yewæmömopa.

² Mīnitō Wængonguï ingante pönëninque Itota Codito mönö Awënë ingante adobaï pönëninque tōmëna inate edæ ate baï pönencæminimpa, ämopa. Ayæ tōmëna godömenque pönö cæda ate mīnitō tōmëna nāna gänë pönönö ante edæ eyepæ pönī entawencæminimpa, ante botō yewæmömopa.

Codito nänö nē emiñæmö inte mönö ümaï entawëmompä

³ Itota Codito iñömö, Nē waa cæbo inte botō ñäö emömo iñömote pöedäni, ante mönö imonte do aa pecä pömompä. Mänömaï Itota Codito

weca pōñōmonte tōmengä Wængonguī nānō tæi pīñæmāmo entawēnongä inte, Quēwēedāni, āninque eyepæ pōnō cæcä ænte quēwēninque mōnō tōmengä awinca ate bai pōnēninque tōmengä nānō waa cædō bai edæ adobai mōnō waa cæmō bamompa. ⁴ Tōmengä nē waa cædongä inte edæ ñāō bai ēmōninque, Botō godōmenque nanguī cædinque waa pōni edæ pōnō cæcæboimpa, ante edæ wæætē wæætē angacāimpa. Īninque mīnitō ĩñōmō tōmengä nānō angāinō ante wede pōnēñōmīnite Wængonguī tōmengä nānō entawēnō pōnongä æninque mīnitō Wængonguī nānō entawēnō bai adobai entawencæmīnimpa. Ayæ māñine ante wede pōnēninque mīnitō inguipoga quēwēninque wēnæ wēnæ mōnō cæinente wægāinō ante, Ñōmænte bacæ wæ, ante wædinque Baa ante edæ aamō cæcæmīnimpa.

⁵ Codito māñōmaī pōnō cæcä beyæ mīnitō wede pōnēmīni inte nē waa cæmīni bacæte ante cōwē edæ pæ pagænte cæedāni. Ayæ wææ nē waa cæmīni badinque Æbānō cæte nō cæquīi, ante ēñēmīni bacæte ante nanguī cæedāni. ⁶ Ayæ wææ māñōmaīnō ante mīnitō nē ēñēmīni badinque godōmenque nanguī cædinque nāmā wææ aamīni bacæte ante cæedāni. Ayæ wææ nāmā wææ aamīni badinque wæætē nē wæntædāmaī inte ee cæmīni bacæte ante cæedāni. Ayæ wææ nē wæntædāmaī inte ee cæmīni badinque mīnitō wæætē Wængonguī nānō ante entawēnō bai entawēninque tōmengä nānō cædō cæte quēwencæte ante cæedāni. ⁷ Ayæ wææ Wængonguī nānō cædō bai cæte quēwēmīni badinque mīnitō ayæ, Mōnō caipæ, ante godongāmæ mīni waa

cæcabo bacæte ante cæedäni. Ayæ wææ mîni godongämæ waa cæcabo bamîni inte mînitö ayæ waodäni tömänäni inänite waadete pönëninque godö waa cæmîni bacæte ante cæedäni.

⁸ Mänömaï wede pönëninque tæï ongöninque waadete pönëninque Wængonguï nänö cædö ante godömenque godömenque entawente cæmîni ininque mînitö mönö Awënë Itota Codito ingante ate bai në pönëmîni inte edæ tömengä beyæ mîni cæquënönö ante oda cæte wädämaï imaïmînipa. Wæætë edæ awæ nanguï inca bai mînitö adobaï mîni cæquënönö ante do cæcæmînimpa.

⁹ Wæætë mäninö tömänö ante entawënämaï ingä guiquënë tömengä möwoyata bai ëmönongä inte inguipogaque waa adinque öönæde ïñömö gobæ i ædö cæte aquingää. Tömengä nänö wënæ wënæ cægäinö ñä do mënongate impa, ante pönënämaï inte önonque quëwengampa. ¹⁰ Ìñänäni ëñëedäni. Wængonguï mînitö imînite do apænte æninque aa pegacäimpa cæmîni. Mînitö, Wængonguï nänö änönonque ante ëñente entawëninque mönö cöwë tæï gongænte ongongæimpa, ante nanguï cæedäni. Edæ mänömaïnonque ante cæmîni inte mînitö oda cædämaï inte tæï ongoncæmînimpa. ¹¹ Ayæ ïincayæ ate näñe wæmîni ate mönö Awënë Odeye Itota Codito ïñömö mînitö imînite ææntodongä goyöminite tömengä, Pö guidäni, ante watapæ æmæwo manguicä guïite cöwë quëwencæmînimpa.

¹² Mînitö mäninö ante do ëñëninque mîni nö pönï ëñënö ante ædæmö entawente tæï ongömîni incæte botö, Godömenque cöwë pönencæmînimpa, ante cædinque adodö adodö ante

apænebo eñencæminimpa. ¹³ Edæ botö, Minitö oda cædämaï inte cöwë pönencæminimpa, ante cædinque botö baonga botö quëwenganca wæætë wæætë apænedinque nö cæte apænebopa, ante pönëmopa. ¹⁴ Edæ mönö Awënë Itota Codito botö imote edonque apænedinque, Bitö oo pöni wæninque botö weca ææ poncæbiimpa, angacäimpa. ¹⁵ Angä eñengaïmo inte botö, Ñöwo botö yewæmöninö ante adinque entawëmini inte minitö iñömö botö gobo ate cöwë pönencæminimpa, ante cædinque ñöwo incæ tæi piñæninque nanguï cæcæboimpa.

Itota Codito Tæiyæ Awënë nänö emönö atamönipa

¹⁶ Mönö Awënë Itota Codito iñömö tæi piñængä ingä inte oo poncæcäimpa, ante minitö iminite apænedinque mönitö dicæ wadäni nani mä apænewënö ante apænetamöniyaa. Wæætë edæ, Tömengä në Awënë inongä inte mönö Tæiyæ Awënë nänö emönö incæ emongampa, ante në agaïmöni inte mönitö, Näwangä agamönimpa, ante apænemöni eñëminitapa. ¹⁷ Edæ Awënë nänö ñäo apäite bai ongöñömö ongonte apænedinque Mæmpo Wængongui incæ, “İngä botö Wengä inongä inte botö në waadecä ingampa. Tömengä ingante adinque botö waa tobopa,” ante apænegacäimpa. Ayæ Itota ingante waa adinque tömengä në ñäo emongä ingante odömongä agamönipa. ¹⁸ Änanquidi tömengä tæiyæ waëmö emonte nänö ongöñömö godongämæ ongöninque mönitö mäninö ante Wængongui öönæde tedecä eñentamönipa.

19 Wængonguī beyæ nē apænegaināni nāni yewæmongainō bai mōnitō adobai edonque agaīmōni inte, Nāwangā iñonte yewæmongadānimpa, ante apænemōni ēñenguēnēmīni imīnīpa. Mānīnō nāni angainō wēmō iñōmō ñāō apāite tica ēnente bai i apa quēwēmīni. Oque pōnente iñonte, Wadaamō æængæimpa, ante wānō cōnāni bai mīnitō adobai mīni ñāō entawenguinque ante Itota Codito nānō ponguīōnæ ante edæ wānō cōnīnque wede pōnēmīni inīnque waa imaimpa. ²⁰ Iñānāni ēñēedāni. Dodāni Wængonguī beyæ nē apænegaināni incæ, Wængonguī æbānō ante apænecā ēñente yewæmonguimoo, ante pōnēnīnque dicæ mā pōnēnīnque adodeque incæ yewæmongadāniyaa. ²¹ Wīi nāmanque pōnēnīnque yewæmongadānimpa. Wæætē Wængonguī Tæiyæ Waēmō Ōnōwoca nempo quēwēñōnānite tōmengā pōnō apænecā ēñēnīnque Wængonguī nānō apænedonque ante apænegadānimpa, ante āmo ēñēmaīmīnīpa.

2

Nē babæ odōmonte apænedāni iīmaī cædānīpa, ante

¹ Doyedē pancadāniya, Wængonguī beyæ apænebopa, ānīnque babæ apænegadānimpa. Ñōwo iñōmō wadāni adobai awēmō cædinque, Mīni cabo oda cæte ēwente wæcæmīnīmpa, ante cædinque babæ ante odōmonte apænequināni mīnitō weca do ongōnānīpa. Mōnō Tæiyæ Awēnē incæ tōmēnāni inānīte æncæte ante nāmā wepæ nē godongaingā iñongante tōmēnāni wæætē nāni

quingæ ömæe ewenguinque edæ Baa änänipa cæminii. ² Pancaminiya nanguï imini incæ mini guifente wæquinque tömënäni nani wentamö mongænte goquino incæ tee empote goquimini iminipa, ante awædö. Mäninö godinque mönö nöingä eñenönö ante piinte cæyömini wadäni adobai mänii taadö nöinö iñonte godö babæ äninque wænæ wænæ änäni baquinänimpa, ante awædö. ³ Nê babæ odömonte apænedäni iñömö minitö maincoo ante ö æinewente wæwënäni inte nämæneque nani pönëwënö ante tededäni eñëninque minitö do oda cæyöminite tömënäni wæætë ö æmainänipa, ante awædö. Mönö nê pangä önoncadopo do ongongainäni inänipa. Mönö nê pangä iñömö, Oo nani ewenguinque mänömai cädänipa, ante apænte ancæte ante piininque edæ möwo mönämai miingä inte a ongongampa.

⁴ Anquedoidi incæ eñenämai cädäni ate Wængongui ata cæpodämai ingacäimpa. Wæætë, Tömënäni nani apænte tente wæquinganca ontatodë wëmö mæ mämönte bai iñömö guii tee mönete ongoncädänimpa, ante cædinque tömengä angä eñente tömënäni nani owogaiñömö tadömengadæ pöni dobæ go guigadänimpa. ⁵ Ayæ doyedë tömengä nänö nê badongainäni inguipoga quëwëñönanite Wængongui tömënäni inänite ata cæpodämai inte angä ate nê eñenämai inäni iñömö edæ æpæmpo bete wængadänimpa. Wæætë Nöwee wodi Docä nani änongä guiquënë, Mönö nö cæte quëwengæimpa, ante nê apænegaingä iñongante Wængongui tömengä tönö tiæte ganca inäni mänimpodänique inänite wææ aacä quëwengadänimpa. ⁶ Ayæ, Todömä tönö Gömoda

iñömö quëwënäni inänite, Mini apænte wido cæquinque, ante tømënanäni quëwëñömö iya täninque wido cæcä gönaiboque bate contagatimpa. Mänömaï cædinque Wængonguï, Botö imote ëñënämaï imïni mïni adobaï tente wæquinque cæminipa, ante wadäni inänite odömoncæte ante cægacäimpa. ⁷ Ayæ ëñënämaï inte cædäni baonque towente quëwënäni adinque Dooto wodi iñömö në nö cægaingä inte, Wentamö pönï mongænte quëwënäni awædö, ante wædongä inte adoyömö quëwëñongante Wængonguï tømengä ingante töö æmænte ö ængä beyænque quëwengacäimpa.

⁸ Tømengä waa cæquinque nö entawënongå inte tømënanäni weca quëwente ayongä iimö iñö iimö iñö ëñënämaï cædäni adinque tømengä, Ancaa ate awædö, Ancaa ëñente awædö, ante wæwëñongante Wængonguï tømengä ingante do ö ængä beyænque quëwengacäimpa. ⁹ Mänömaï cædinque Wængonguï, Botö miñæ në pönäni caate wædäni adinque botö do ëñente cædinque æmo ate quëwënänipa. Wæætë wiwa cædäni inänite botö apænte anguiönæ ganca mö ongonte bai mäninque ñowo incæ wæætë wæætë pämo wædänipa, ante Wængonguï cæcampa. Ininque, Nö ëñente Wængonguï cæcampa, ante mönö edonque ëñengæimpa. ¹⁰ Mänüi babæ ante në odömonte apænewënäni iñömö tømënanäni baonque ante towëinente näni entawëmämo ante në cædäni inönäni inte edæ awëñëidi inänite, Wüi ëñëinë wædö, ante piinänipa. Mänömainö ante në piinte änäni inänite godömenque pancæte ante Wængonguï mö ongonte bai mangampa. Tømënanäni iñömö nämä ængö cædinque guïñënedämaï inte edæ në ñäö entawente tæi emönäni inänite

godö wënæ wënæ apænedinque edæ babæ ante tedewënänipa. ¹¹ Iñæmpa anquedoidi tæi piñænäni inte godömenque ñænænäni inönäni incæ Wængongui ayongante guiñēnete wædinque nē ñäö entawente tæi emönäni inänite piinte apænte änämaï inänipa.

¹² Nē babæ ante odömönäni guiquēnē tömēnāni nāni nē adāmaï inö ante mā pönēninque wënæ wënæ apænedinque babæ ante tedewënänipa. Babæidi omæwocadāni inte nāni togænte ecate ewenguinque ononque pōni cægōnāni bai nē babæ odömönäni iñömō edæ adobai eñēnāmaï ināni inte tōmēnāni nāni wænguinque babæ cædinque quingāmē bai quēwënänipa. ¹³ Tömēnāni wadāni inänite godö wīwa cædāni ininque iināni wæætē näēmæ godö cædāni wæcædänimpa. Tömēnāni iñömō, Itædē incæ mönō baonque pōnente towengæimpa, ante cædänipa. Mīnitō waadete pönēninque godongāmæ cæñōmīni tōmēnāni adoyömō pōninque cæowæo incædō beowæo incædō inte cæyönāni wentamō nāni mongænō beyænque mīni cabo wæætē baate bai eñamīni badinque wentamō tæ encaa tæ encaa emonte bamīni awædō.

¹⁴ Wacā onquiyængä awinca adinque cōwē godö towēinente wædāni inte tōmēnāni iñömō ñimpo cædāmaï cōwē wīwa cæinente wædänipa. Wacā aqui piñænāmaï ingä adinque tōmēnāni, Mōnitō tönō godongāmæ ponte wënæ wënæ cæcæcäimpa, ante cædinque godö waa cæte bai babæ cædänipa. Botō qui botō qui, ante nē æinente wædāni iñönänite Wængongui iñömō, Tömēnāni nāni wæwocaincabo inänipa, ante piinte angampa.

15 Taadö töinö oda cædinque edæ docä Beodo wodi wengä Badäo wodi miñæ tömënäni tee empote godänipa. Tömengä Badäo iñömö, Nö cædämaï imo incæte botö mäincooque ænte tobote, ante bai cægacäimpa. 16 Tömengä Wængongui beyæ nē apænecä incæ ocai ömæcacä bai inte wapiticæ eññänämaï cæyongante babetadecä iñingä incæ bodo incæ iñontobæ wao bai tededinque Badäo ingante wææ angacäimpa.

17 Mänüi ñöwodäni nē babæ odömönäni iñömö æpæ taquëññömö æpæ dæ ä bai edæ önönänique inte odömönänipa. Boguïmancoo wini cai mongænte önonque ænte poncoo bai tömënäni adobai inäni inte önonque cædänipa. Mänömaï cædäni beyæ Wængongui, Tömënäni nāni ongonte wæquiññömö, ante mæ mämönte bai iñömö badongacäimpa.

18 Edæ tömënäni ogæ tededinque, Botö godömenque waa pönï cæbo aedäni, ante önonquedö ante tedewënänipa. Wadäni wapiticæ cæte quëwënäni nempo adocanque wodo aamö cæyongante mäninäni nē babæ odömönäni iñömö, Bitö mönitö miñæ wæætë pöninque baonque bitö cæinëwënö ante guiññädämaï inte cæte tocæbiimpa, ante waa cæte bai godö babæ cædänipa. 19 Mini ædæmö aamö cæte mönedämaï quëwenguinque mönitö miñæ pöedäni, ante babæ änewënänipa. Incæte nē babæ odömönäni incæ tömënäni nāni wiwa cædonque beyænque cæte quëwënäni beyænque näëmæ ñä cæyænte bai inte wædänipa. Edæ quiëmenque ante waocä eññente cæcää tömengä mäninö nänö eññente cædö beyænque nē cæte quëwënongä inte näëmæ ñäo

cæyænte bai inte wæcampa.

²⁰ Inguipoga ñömænguënëmämo beyæ tee mönete bai quëwëninäni inte tömënäni mönō Awënë Itota Codito mönō ìmonte nē Ængaingä ingante do ate bai pönëninque edæ abæ tawænäni inänitapa. Mänömaï abæ tawænte godinäni inte tömënäni inguipoga ante nāni cæinente wæpāmo beyænque wæætē adodō go goyo cæte ægodawate tæ wææntodonte bai wædāni ìninque tömënäni godömenque nāni wënæ wënæ wæwenguinque ìmaimpa. ²¹ Nöinō taadō do adināni inte tömënäni nāni godömenque wæwenguinque ëmō cæte godänipa. Wængonguï tæiyæ waëmō nänō wææ angainō ante odömönäni nāni do ëñëninō ante Baa ante wadæ godäni ìñömō godömenque wënæ wënæ nāni wæquinque ìmpa. Ìninque mäninō taadō ante tömënäni cōwë adāmaï inäni inte bai tömënäni beyæ godömenque waa incædönimpa. ²² Tömënäni nöinō taadō ëmō cæte godināni nāni cædō bai ante ìmainō ante nāwangä ante badete todänipa. “Guinta awæ wëningä adodō cængampa. Odæ wængänä ìñömō æpæ pantate ate onguipoipæ wëango wëango nangampa.”

3

Mönō Awënë wæætē adodō poncæcäimpa, ante

¹ Botō nē waadedömīni ëñëdäni. Minitō möwo mönāmaï inte nöingä ante pönencæminimpa, ante botō, Mänömaï impa, ante mentaa yewæmöninque adodō adodō ante yewæmōmo aedäni. ² Tæiyæ waëmō entawënäni Wængonguï beyæ ante apænedinque nāni yewæmongainō ante nē adimīni inte mīnitō wæætē pönencæminimpa,

ante cæbopa. Mönö Awënë mönö ïmonte në Ængaingä inte adobaï ante wææ angacäimpa. Tömengä nänö da godongaimöni iñömö tömengä nänö wææ angainö ante apænemöni eñëmini inte minitö wæætë adodö ante pönencæminimpa, ante cædinque yewæmömopa.

³ ïimai ante täno apænebo eñencæminimpa. Mönö waocabo inguipoga mönö quëwëmämo wodo ïinque bayonte në badete todäni cöwë poncæðänimpa. Pöninque tömënäni badete toðinque nämä nani wënæ wënæ cæinënö ante edæ do cæquïnäni inänipa. ⁴ Tömënäni ïimai ante badete tocæðänimpa. “Codito nänö ponguinque impa, ante wæðänitedö abi. Iñæmpa Wængonguï nänö badongäñedë inguipo nänö cægai bai mæmæidi wodi wænte godäni ate ñöwo ganca adobaï inte cæ apa guïñewëminii,” ante badete toquïnäni inte poncæðänimpa. Apænebo eñëedäni. ⁵ Wængonguï iñæmpa adodeque angä beyænque öönæðë owocoo edæ do bagatimpa. Adodeque angä beyænque onguipo æpæ tæcæpæno odæ yate ongöñonte tömengä æpæ tönö badongä ongompa. Mänömai impa, ante edonque ï incæte tömënäni, Mönö Baa angæimpa, ante beyænque adämai inte bai pönënämai inänipa. ⁶ Ado æpæ inguipoga mæ ä beyænque Nöwee wodi quëwengäñedë mäninguipo nänö ingai dæ badinque waguipo bai bagatimpa, ante edæ ñöwodäni iñömö adobaï pönënämai inänipa. ⁷ Ayæ adobaï Wængonguï adodeque angä beyænque öönæðë owocoo tönö ïinguipo ñöwo mini cægonguipo edæ iya tanguinque ongompa. Tömengä, Botö ïmote në Baa änäni inänite botö

apænte pante wido cæquïönæ ganca mänïï öönæ tönö iinguiipo ongompa, angampa.

⁸ Botö nē waademini edæ eñeedäni. Mönö Awënë ayongante adoönæque incæ edæ, Miido ganca wadepo bai impa, ante acampa. Miido ganca wadepo iñonte mönö Awënë ayongante, Adoönæque bai impa, ante acampa. Mänömainö ante adodeque incæ minitö cöwë eñente pönëedäni, ämopa. ⁹ Mönö Awënë, Cöwë pönö cæbo æncæminimpa, ante nänö angainö ante pancadäniya, Æiuedö mönö Awënë cæquingää, ante wædänipa. Mönö Awënë iñæmpa wii wæntæye ingampa. Wæætë, Adocanque wænämaï incæcäimpa. Wæætë tömänäni, Idæwaa wënæ wënæ cæte awædö, ante botö gämænö poncædänimpa, ante cædinque tömengä mäninö beyænque ee cædämaï ingampa. Ìinque tömengä, Minitö wæætë botö gämænö æiuedö ponguimini, ante wänö cöninque edæ ee pönämaï ingampa.

¹⁰ Incæte nē awëmö ö ængä iñontobæ nänö pömaï mönö Awënë nänö poncæ cæönæ iñömö adobaï iñontobæ ponguinö angüënë. Nanguï tæi tæi téninque öönædë owocoo incæ iñontobæ dæ goquinö angüënë. Gongä nani angä nanguï pönï bæco ìinque edæ Wængongui nänö badongaincoo tömancoo edæ aca podinque edæ ewente bacæimpa. Inguipoga tömäo ongoncoo dæ ba ìinque inguiipo önömæca pönï baquinö angüënë. ¹¹ Tömancoo edæ mänömaï ewenguincooque impa, ante adinque edæ minitö iñömö, Æbänö quëwenguï, ante pönëmini. Wængongui nänö cædö bai cöwë cædinque tæiyæ waëmö quëwenguënëmö imompa. ¹² Wængongui

nänö ponguïönæ iñömö edæ æyedënö ponguïi, ante wänö cöinque, Quingæ pönï pongæimpa, ante mönö nanguï cæcæimpa. Mäniönæ iñonte edæ öönæ incæ gonga bæcote ewente bayonte Wængonguï nänö badongaincoo incæ nanguï ocoi äinique tömancoo aca podinque ewente baquïnö anguënë. ¹³ Picæönæ tönö pedænguipo ömæe ewëninque Wængonguï wæætë, Botö müiönæque tönö müinguipoque pönö badoncæboimpa, ante nänö angainö bai do badoncæcäimpa. İninque mönö iñömö, Müiönæ tönö müinguipo iñömö mönö nö pönï cæte quëwengæimpa, ante nanguï äinente wæmompä.

¹⁴ Botö në waadedöminï eñëedäni. Mänömai bacæimpa, ante në äinente wæminï inte minitö iñömö edæ, Mönö mäniñedë wentamö entawënämai imö adinque Wængonguï pïinämai incæcäimpa, ante nanguï cædinque edæ nämä wææ aedäni. Ayæ tömengä, Botö ayömo waëmö ewocamïni İninque edæ mönö godongämæ piyænë cæte quëwengæimpa, ante pönö cæcæcäimpa, ante edæ nanguï cæedäni. ¹⁵ Mönö quëwenguinque ante mönö Awënë edæ ee ongonte pönämai ingampa, ante pönëedäni. Wængonguï pönö cæcä ate ocai në encacä bate pönëninque mönö tönïñacä Pabodo mönö në waadecä inte adobainö ante minitö iminite edæ, Acæminimpa, ante yewæmongantapa. ¹⁶ Wængonguï mönö quëwenguinque ante ee pönämai ingampa, ante cadota ante yewæmöninque Pabodo adobainö ante edæ cöwë yewæmongampa. Tömengä nänö yewæmöninta pancataa wïi edonque i adinque në eñënämai inäni tönö aquïi pïñænämai inäni

iñömö edæ oda cædinque wapiticæ odömönänipa. Tömënäni edæ Wængongui angä ëñente nãni yewæmongainta tömantaa adobaï adinque tömënäni nãni æmæwo ëwenguinque edæ wapiticæ odömönänipa.

¹⁷ Botö nè waademini ëñeedäni. Mänömaï impa, ante do ëñëmini iñöminite Wængongui nänö wææ angainö ante ëñënämaï cædäni inäni guiquënë minitö iminite töö æmænte wapiticæ ænte gocæ cædäni ate wædinque minitö wæætë tömënäni miñæ godämaï iedäni. Wæætë edæ Tæiyæ Awënë nempo quëwëmini inte, Tæi gowæænämaï incæboimpa, ante nämä wææ aaedäni. ¹⁸ Mönö Tæiyæ Awënë Itota Codito ængä beyænque mönö quëwëmompä. Ìinque tömengä waadete pönö cæcä ate minitö tömengä ingante ate baï pönëninque wadäni inänite godömenque waadete godö cæmini baedäni. Tömengä iñömö edæ ñowopämo iñonte wapämo mümämö iñonte edæ cöwë tæi ëmongä inongä inte ñäö apäite baï ëmongampa, ante adinque mönö ñimpo cædämaï inte tömengä ingante cöwë waa acæimpa. Mänömaï baquinö angüënë, ante botö, Amëë, ämopa.

Wængonguï nänö Apænegainö New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9bedab5a-39ff-5163-a35b-8056cbbe8690